

18. marts 2014

UPA 2014/124
Jens Immanuelson

**Uunga siunnersuut: Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. xx, xx 2014-imeersoq (tuniniaanissamik nittarsaassisarnermut inatsit)
(Inuussutissarsiornermut Aatsitassanullu Naalakkersuisoq)**

Tuniniaanissamik nittarsaasineq aamma nalunaaqutsersuisarneq pillugu Inatsisartut inatsisaat imatut Siumumiit oqaaseqarfigissavarput.

Siumumi anguniartuarparput inuiaqatigiinni susassareqatigiittut akuutitsinissaq tamannalu aamma atuuppoq inatsisitigut aaqqissuussaasuni innuttaasut akuutinneqarnissaat.

Tuniniaanissamik nittarsaassineq aamma nalunaaqutsersuisarneq pillugu Inatsisartut inatsisaani nutarterniarneqartumi akuutitsineq Inatsisartut inatsisaanni nr. 10, 13. november 1986-meersumi atuussimavoq inatsisillu nutartertariaqarnerata maannakut inatsisissatut siunnersuutikkut akuutitsineq peerniarneqartoq Siumumiit eqqarsarnartoqartipparput.

Inatsisissatut maanna saqqummiunneqartukut Kalaallit Nunaanni atuisartunut pisisartunullu siunnersuisoqatigiit, aamma atuisartunut pisisartunullu tungasumik ataatsimiititaliat sumiiffinni toqqarneqartartut atorunnaarsinniarneqarput atuisartut pisisartullu siunnersuisoqatigiivi aamma atuisartunut pisisartunullu tungasumik ataatsimiititaliat pisisartunut qanittumik sullissisuusut atorunnaassappata tamanna innuttaasut susassareqatigiittut najukkani qanittumik pisisartut atuisullu saaffiginniffigisinnaasaannik annaasaqarnermik kinguneqartussaammat Siumumi isumaqarpugut suliassaq peqqissaarullungu suliarineqartariaqartoq.

Siumumi ilisimavarput inatsisit naleqqussarneqartariaqarnerat aamma inatsit qulaani oqallisigineqartoq naleqqussarneqartariaqarmat taamaattorli innuttaasut atuisut pisisartullu sinnisoqartitaanerat atorunnaarsillugu atuisartoqarnermut unammilleqatigiinnermullu aqutsisoqarfik atuutilerpat sullissineq sukkanerusumik ingerlanneqalissasoq qularinngilarput, taamaattorli atuisartut pisisartullu sinniisaat najukkani inatsisitigut illersugaasumik atuuttut atorunnaasinniarneqarnerat nalilersorneqassasoq ilangullugu kaammattuutigissallugu innuttaasut atuisut qanittumik saaffissaqarnissaat qulakkeerumallungu.

Siumumi isumaqarpugut ullumikkutut pisisartut sinniisaat aammalu atuisut siunnersuisoqatigiiffiat innuttaasunit peqataatitsiffiusoq atorunnaarsinnagit inatsit naleqqussarneqarsinnaanera isumaliutigineqartariaqartoq.

Tuniniaanissamik nittarsaasisarneq aamma nalunaaqutsersuisarneq pillugu inatsisissaq sullissinermik pitsaanerusumik aqqutissiuussinissamik siunertaqarpoq taamaatumillu tuniniaanissamik nittarsaassinermi kalaalisut oqaatsitta ersarissumik piomasaaqaataalernerat iluarisimaaratsigu Siumumiit oqaatigissavarput,

Inatsisissatut siunnersuut peqqissaartumik sukumiisumillu suliarineqassasoq kaammattuutigalugu ataatsimiititaliami susassaqtumut suliarineqassasoq innersuussutigaarput.